

四庫全書

子部

欽定四庫全書

子部

古今事文類聚後集卷二十

詳校官中書_臣康綸鈞

侍讀_臣孫球覆勘

總校官編修_臣王燕緒

校對官中書_臣趙秉淵

謄錄監生_臣胡晚春

欽定四庫全書

古今事文類聚後集卷二十

宋 祝穆 撰

肖貌部

髮

羣書要語身體髮膚受之父母不敢毀傷孝經拂髮總角

注收髮結之內髮彼兩髦柏髮髮髮如雲不屑髦也君子偕老

卷髮如蠶都人黃髮兒齒闕子髮曲局米尚猶詢茲黃

髮則罔所愆

秦誓

黃髮垂髯

陶文

詩句人生莫遣頭如雪雖得春風亦不消

高蟾

青銅不攬

一兩日白髮又添三四莖

趙企

古今事實

朱髮

共工人面蛇身朱髮

歸藏啓莖

鬢髮而美

昔有仍氏女鬢黑而甚美光可以鑑名曰玄妻

左傳

剪髮為犧

殷旱五年湯乃以身禱剪髮自以為犧

被髮佯狂

箕子被髮佯狂 接輿之被其髮也欲去而懼其害
子楊

斷髮文身

周太伯避位斷髮文身

一沐三握髮

周公戒伯禽曰一沐三握髮猶恐失天下之賢人

被髮而祭

初平王東遷卒有適伊川見被髮而祭於野者曰不及
百年此其戎乎其禮先亡矣後秦晉遷陸渾之戎於伊

川僖

余髮種種

齊侯田于莒盧蒲癸見泣且請曰余之髮如此種種

短也

余奚能為

左

被髮左社

孔子曰微管仲吾其被髮左衽矣

生而髮白

老聃初生而髮白故曰老子

世說

年少髮白

顏回年二十九而髮白

家語

怒髮衝冠

藺相如使秦持璧却立怒髮衝冠

鬚髮盡白

蘇武留匈奴十九年始以強壯出使及還鬚髮盡白

以石拭髮

漢元鼎間鄧支國貢馬肝石百升以之拭髮白者皆黑
帝坐羣臣於甘泉殿有髮白以此拭之應手皆黑是時
公卿語曰不願方伯惟願拭肝石

髮鬚鬚美

謝靈運欲入遠公社遠公拒之曰子髮鬚而鬚美面與
身戾非令終之相運怒曰學道在心安以貌耶遠公笑

而不答後果如所料

嵩仲虛鈔
書紀事

惡見髮白

後梁蕭詧惡見人髮白事之者必方便避之擔輿者冬月必須裹頭夏月則加蓮葉帽

曾祖拔白

齊高祖恒令左右拔白髮隆昌王高祖之孫年五歲戲於床前帝曰兒言我是誰答曰大翁帝曰豈有為人曾祖拔白髮乎即擲去鏡鑷

一宿髮白

齊謝超宗武帝收超付廷尉一宿髮白

編字髮白

見著書門

題榜髮白

見字學門

四十髮白

後魏李冲年四十鬢髮班白

母病髮白

唐李日知母老病調侍數日鬚髮輒白

服藥髮白

寇萊公準年三十餘太宗欲大用尚以其少準遽服地黃煎餌蘆服以反之未幾鬚髮皓白

髮如線直

軒轅先生居羅浮山宣宗召禁中問道術能散髮箕踞用氣攻其髮條條如鐵線直

大中遺事

皤然一翁

沖卿戲謂髮白者未鑷時皤然一翁鑷盡時公然一婆

雜志

古今文集

雜著

白髮賦

晉左思

星星白髮生於鬢垂雖非青蠅穢我光儀策名觀國以此見疵將拔將鑷好爵是縻白髮將拔愁然自訴稟命不幸值君年暮逼迫秋霜生而皓素始覺明鏡惕然見惡朝生晝拔何罪之故予觀橘柚一一皤曄貴其素華

匪尚綠葉願戢子之手攝子之鑷咨爾白髮觀世之途
靡不追榮貴華賤枯赫赫閭閻藹藹紫廬弱冠來仕童
髻獻謨甘羅乘軫子奇剖符英英終賈高論雲衢拔白
就黑此自在吾白髮臨欲拔瞋目號呼何我之冤何子
之誤甘羅自以辯慧見稱不以髮黑而名著賈生自以
良才見異不以烏鬢而後舉聞之先民國用老成二老
歸周周道肅清四皓佐漢漢德光明何必去我然後要
榮咨爾白髮事故有以爾之所言非不有理曩貴耆老

今薄舊齒皤皤榮期皓首田里雖有二毛河清難俟道
時之變見歎孔子髮乃辭盡誓以固窮昔臨玉顏今從
飛蓬髮膚至眊尚不克終聊用擬辭比之國風

櫛銘

盧仝

人之有髮兮旦旦思理有身有心兮胡不如是

古詩

示僚佐

南史何長瑜

陸展染白髮將以媚側室青青不解久星星行復出

謫居三適旦起理髮

蘇子瞻

安眠海自運浩浩潮黃宮日出露未晞鬱鬱濛濛霜松老
櫛從我久齒踈含清風一洗耳目明習習萬竅通少年
苦嗜睡朝謁常忽忽爬搔未云足已困冠巾重何異服
轅馬沙塵滿風駿凋鞍響珂月實與械杻同解放不可
期枯柳豈易逢誰能書此樂獻與腰金公

鑷白

韋莊

白髮太無情朝朝鑷又生始因絲一縷漸至雪千莖不

避佳人笑唯慙稚子驚新年過半百猶歎未休兵

送隱者

杜牧

無媒徑路草蕭蕭自古雲林遠市朝公道世間唯白髮
貴人頭上不曾饒

詩話

四十髮白

杜正獻公自少清羸若不勝衣年過四十鬢髮即盡白
歐公素出其門公謝事居宋歐適來為守相與甚歡公

年時八十憂國之意每見於色歐公和詩有貌先年老
因憂國事與心違始乞身公得之大喜嘗自諷誦

石林詩話

鬚髯

髯附

羣書要語奮髯抵几

六帖

掀髯一笑

坡集

離離若緣坡之竹

鬱鬱若春田之苗

王褒髯奴詞

髭口上鬚也髯頰上鬚也鬣長鬚也

說文

詩句張公一生江海客身長九尺鬚眉蒼

杜

古今事實

禿無鬚眉

傳說之狀禿無鬚眉

荀子

滅髭為婦

衛蒯聵亂子羔滅髭鬚鬢衣婦人之衣逃得出曰父子爭

國吾何為其間乎

幽通賦注

拔鬚為宦

秦太后拔嫪毐鬚眉為宦者

用兵鬚白

後漢岑彭從光武圍隗囂於西城帝留蓋延耿弇圍之
車駕東歸勅彭曰兩城若下便將兵南擊蜀人苦不知
足既平隴復望蜀每一發兵頭鬚為白

拊鬚大奇

魏任城王彰為北中郎將討烏桓有功歸太祖喜拊彰
鬚曰黃鬚兒大奇

拊虎鬚

吳朱桓還屯濡須權祖之桓奉觴曰臣當遠去願一拊

陛下鬚無復恨權憑几前席桓進捋鬚曰臣今日真謂
捋虎鬚矣

紫髯將軍

張遼問吳降人曰向有紫髯將軍是誰降人答曰是孫
會稽也

髯參軍

郗超為大司馬桓溫參軍溫傾意禮待時王恂亦為溫
主簿亦為所重府中語曰髯參軍短主簿能令公喜能

令公怒

齊髯公

許惇為司徒主簿以明斷見稱人號為鐵主簿又美髯
下垂至帶省中號為長髯公齊文宣常因酒截其半髯
只留一握惇懼不復敢長人號為齊髯公

三國
典畧

捋鬚不凡

謝安捋桓伊鬚曰使君於此不凡

詳見
笛門

始見二毛

潘岳春秋三十有二始見二毛

作蝟毛磔

劉琰稱桓溫鬚作蝟毛磔

以羝嘲鬚

鍾毓兄弟好嘲聞安陵能作調試共視之於是與弟共載從東門至西門一女子笑曰車中央殊高二鍾都不見車後一門生曰中央高者兩頭羝毓兄弟多鬚故以

此嘲之

世說

施鬚塑佛

見端午門

二十鬚白

晉王彪之年二十鬚鬢皓白時人謂之王白鬚

遭喪髮白

後魏睦夸年二十父喪鬚鬢致白後周柳敏遭母憂

旬日間鬚髮半白

鬚長五尺

劉曜身長九尺三寸垂手過膝生而眉白目有赤光鬚

髯不過百餘根而長五尺

鬚長四尺

魏李珪聲姿高暢眉目踈明鬚長四尺甚有威重

捋鬚進諫

陳宣帝因內宴王軌侍坐上壽捋帝鬚曰可愛好老公
但恨後嗣弱耳以叔寶非社稷主也

髭鬚如戟

見淫婦門

稱髯為羊

宋武帝狎侮羣臣各有稱目多鬚者謂之羊

藝眉種鬚

李庶以清辯每接梁客徐陵謂其徒曰唯有李庶可語
耳庶無鬚髯人謂天閹崔謐嘗翫庶曰教弟種鬚取雖
刺而為竅以馬尾挿之世傳諸崔多惡疾故庶答曰先
以方回施貴族藝眉有効然後種鬚邢邵笑謂謐曰卿
不諳李庶何故犯之

但稱好鬚

李緯為民部尚書太宗問曰房玄齡聞李緯拜尚書如
何對曰玄齡但云李緯好髭鬚更無他語太宗遽改緯
洛州刺史

拂丞相鬚

寇萊公為相丁晉公參知政事嘗會食都堂羹染公鬚
謂起拂之公正色曰身為執政而親為宰相拂鬚耶謂
慙遺事

戲多髯

秦少游在東城坐中或調其多髯少游曰君子多乎哉

東坡笑曰小人樊須也

聞見錄

古今文集

古詩

答裴仲謨摘白鬚行

秦少游

仲將題凌雲比詵鬚盡白陸展媚側室星星染為黑人
生如寄耳况復形與色澤壑藏山舟夜半輸有力龐眉
賦不遇已矣何所惜二毛三秋興自愛頗姑息聞諸古

竺乾毛髮因地得數窮反其本螻蟻得而食妙年光可
鑒炯若鴉羽戢映梳何蒼蒼變化了無隙所以梵志云
昔人已非昔皤然君勿笑子羽以貌失信美如客兒終
剪施摩詰我作白鬚行而得養生術

詩話

于思多鬚

山谷戲歐陽誠發詩云愛公好詩又能多老夫何有更
橫戈奈此于思百戰何按左傳華元巡城城者謳曰于

思于思棄中復來注于思多鬚貌

滿面髭鬚

魯直嘗言髯多而踈秀者必貴密而短者必神氣不足
駙馬都尉王晉卿與殿帥曹貫道皆無鬚每指髯多者
為中相法晉卿尚貴主嘗經從鞏洛間道有後唐莊宗
廟默念始治終亂意斯人必胡人觀神象兩臉皆髭也
晉卿作詩寄貫道云代梁繼李號良圖却感歌兒使喪
軀試拂塵埃覘像貌元來滿面是髭鬚

以鬚為戲

丁晉公與楊文公遊處宴集必有談諧之語復皆敏於
應答一日臺諫攻文公因晚俟晉公之門方伏拜晉公
亟謂文公曰內翰拜時須擊地文公隨聲答曰相公宴
處幕瞞天蓋楊美鬚髯而丁方盛張帷幙互相譏也

腹心 膽附

羣書要語今予其敷心腹腎腸厯告爾百姓于朕志
君之視臣如手足則臣視君如腹心 孟子百姓怨氣滿腹

庚盤

后郊
祀志

詩句一笑皆捧腹荆公蚤歲藜莧腹 十圍便腹貯天真

並坡

心人心惟危道心惟微惟精惟一允執厥中禹謨欲脩其

身者先正其心大學我心匪石不可轉也柏舟萬惡不可納

於靈臺注心為神聖之臺莊子至人之用心若鏡不將不

迎應而不藏凡人心險於山川莫知於天王應帝心固可

使如灰乎齊物心無天遊則六鑿相攘外物學問之道求

放心

孟子

心之官則思

告子

心者形之君而神明之主也

神問

心居中虛以治五官

荀子

聖人清其天君

荀子

心搖搖然如

懸旌而無所終薄

蘇秦傳

包藏禍心

左傳

心之不同如其面

焉

富辰傳

心要在腔子裏

伊川語錄

心之虛靈無有限量如六

合之外思之即至前乎千百世之已往後乎千萬世之

未來皆在目前爾人為利欲所昏所以不見此理

朱語錄

一日看除目三年損道心

姚合

人於心上起經綸

康節

古今事實

鼓腹而遊

赫胥氏之民含哺而嬉鼓腹而遊

莊子

河魚腹疾

申叔展語還無社曰有麥麴乎曰無有山鞠窮乎曰無
河魚腹疾奈何

足加君腹

見隱逸門

腹便便

見眠睡門

東床坦腹

見擇壻門

曬腹中書

見七夕門

腹中無物

王丞相導枕周伯仁膝指其腹曰卿此中何有答曰此

中空洞無物然容卿輩數百人

世說

腹藁

見文章門

心有七竅

以下係心

王子比干諫紂以為妖言妲己謂曰吾聞聖人之心有

七竅竅有九毛遂剖視之

列女

事君三心

孔子不見晏子曰晏子事三君而得順焉是有三心所

以不見也

孔叢子

余心蕩

楚武王伐隨入告夫人曰余心蕩矣

莊

心齋

顏淵曰敢問心齋仲尼曰惟道集虛虛者心齋也

人間世

有兩心

褚先生曰武帝以任安坐觀成敗有兩心

田叔傳

方寸亂

見母子門

會心林木

簡文帝入華林園顧左右曰會心處不必在遠翳然林木便自有濠梁想覺魚鳥自來相親

世說

狗面人心

苻朗

堅從兄

初過江王忱與兄國寶命駕詣之沙門法伏

問朗曰是王吏部兄弟乎朗曰非一狗面人心又一人

面狗心者是耶忱醜而才國寶美而狠故也

裴景泰書

木人石心

賈充曰此吳人木人石心也

賈統傳詳見風濤之險門

鐵心石腸

見梅花門

一身是膽

以下係膽

蜀趙雲字子龍曹公爭漢中地運米北山下數千萬囊雲與黃忠取米為公前鋒所擊且戰且却入營大開門公軍疑而引去雲雷鼓震天弩射公軍墮漢水死者甚

衆先主曰子龍一身都為膽也軍中號威將軍 後周
王雅蒞山之敗諸將皆退雅獨拒之左右奮斬九級齊
人稍退雅乃還周文王曰王雅舉身是膽也

體青膽破

南史王融矯詔立竟陵王子良太學生魏準鼓成其事
及融誅召準入舍人省詰問遂懼而死舉體皆青以為
準膽破

膽大心小

孫思邈對盧照鄰曰膽欲大而心欲小

古今文集

律詩

寶山晝寢

蘇子瞻

七尺頑軀走世塵
十圍便腹貯天真
此中空洞渾無物
只可容君數百人

詩話

腹負將軍

東坡聞子由瘦云十年京國厭肥羶日日饒花壓紅玉
從來此腹負將軍今者固宜安脫粟俗云大將軍食飽
捫腹而歎曰我不負汝左右曰將軍固不負此腹此腹
負將軍未嘗少出智慮也

林志

託鼓嘲腹

高爽題鼓嘲孫挹云身有八尺圍腹內無寸腸面皮如

許厚受打未遽央

談藪

雜著

係心

論人心道心

朱元晦

心之虛靈知覺一而已矣而以為人心道心之異者以其或生於形氣之私或原於性命之正而所以為知覺者不同是以或危殆而難安或微眇而難見爾然人莫不有是形故雖上智不能無人心亦莫不有是性故雖下愚不能無道心二者雜於方寸之間而不知所以治之則危者愈危微者愈微而天理之公卒無以勝夫人欲之私矣精則察夫二者之間而不雜也一則守其本

心之正而不離也從事於斯無少間斷必使道心常為一身之主而人心每聽命焉則危者安微者著而動靜云為自無過不及之差矣

中庸序

求其放心齋銘

朱元晦

天地變化其心孔仁成之在我則主於身某王伊何神明不測發揮萬變立此人極畧刻放之千里其奔非誠曷有非敬曷存孰放孰求孰亡孰有詘伸在臂反覆惟手防微謹獨茲守之常切問近思維以相之

主一齋銘

張欽夫

人之心一何危紛百慮走千岐惟君子克自持正衣冠
攝威儀澹以整儼若思主於一復何之事物來審其幾
應以專匪可移理在我寧彼隨積之久照厥微靜不偏
動靡違嗟勉哉自邇卑惟勿替日在茲

手足

羣書要語十手所指其嚴乎

大學

不知手之舞之足之蹈

之也詩上之親下如手足之於腹心

家語

毒手尊拳

五代史

老拳

三國志

下之於上若手臂之捍頭目而覆胸腹也

荀議

兵若跣弗視地厥足用傷

說命

逃空虛者藜藿拄乎鼯鼯

之徑踉位其空聞人足音跼然喜矣

徐無鬼

搖足則闢中

非陛下有也

蕭何傳

詩句翻手作雲覆手雨

杜

惆悵江湖釣竿手却遮西日

向長安

杜牧

收取玉堂揮翰手却來南畝把犂鋤

歐

濯足

萬里流

王維

一夜蠻生足

坡

手脚凍皴皮肉死

杜

古今事實

手胼足胝

禹決江河腓無股脛無毛

莊子

手足胼胝面目黎黑

李斯傳

有文在手

成季之將生也桓公使楚丘之父卜之曰男其名曰友

及生有文在其手曰友遂以命之

閔二

不龜手藥

宋人有不龜手之藥者世世以泔澠統為事客聞之請買其方百金與越人水戰大敗越人吳王裂地而封之

注云其藥能令手不龜折故常漂絮於水中也

莊子

如失左右手

蕭何追韓信漢王如失左右手

玉手同色

晉王衍每捉玉柄麈尾與手同色

炙手可熱

元載時委左右四人用事權傾中外人為之語曰鄭揚
段薛炙手可熱 樂安公主元宗之妹附會韋氏熱可

炙手人咸畏之

手爪似鳥

見神仙門

手重五斤

陸餘慶善論事而謬於判時人嘲之曰說事喙長三尺
判事手重五斤

下堂傷足

以下係足

樂正子春下堂而傷其足數月不出猶有憂色曰父母
全而生之子全而歸之可謂孝矣今予虧孝之道予是

以有憂色

祭義

獻玉則足

見玉門

重繭不休息

楚欲攻宋墨子聞之自魯趨而十日十夜足重繭而不
休息至郢見楚王申包胥如秦乞師踰越險阻曾繭

重胝立於秦庭號哭七日

幽通賦注

兩足不相隨

衛侯之兄輒何為君也曰有天疾者不得入乎宗廟輒

兩足不能相隨齊謂之綦楚謂之蹶衛謂之輒穀梁傳

不良於行

孟軻之足不良於行

註跛也

斬笑躄者

見笑門

脚病乘輿

江州刺史王弘半道要淵明還州問其所乘答云素有脚病向來監輿亦足自反乃令一門生二兒共輿之

以脚病廢

習鑿齒以脚病廢於里巷苻堅滅樊鄧素聞其名與釋道安俱舉而致焉與語大說以其蹇疾裁堪半丁

脚短三寸

庾玉臺希之弟也希誅將戮玉臺子婦宣武弟桓豁女徒跣求進閣禁不內女厲聲曰是何小人我伯父門不聽我前因突入號泣請曰庾玉臺常因人脚短三寸當復能作賊否宣武曰壻故自急遂原玉臺一門

世說

洗脚失財

梁陰子春傳身服垢污脚數年一洗言每洗脚則失財敗事云在梁州以洗足致梁州敗

膝久不屈

田承嗣傲狠不軌子儀遣使至魏承嗣西望拜指其膝曰茲膝不屈於人久矣今為公拜

失轍方相

婁師德長大而貌異於眾又病足張元一目為失轍方相

因蹇進諷

姚崇為相張說懼譖毀岐王申款他日崇對於便殿行
微蹇上問有足疾乎對曰臣有腹心之疾非足疾也

古今文集

律詩

和周王孺隆馬傷手

蘇子瞻

平生學道已身完豈復兒童私自憐醉隆何曾傷內守
色憂當為念先傳書空漸覺新詩健把觥行看樂事全

賣却老騾為酒直大呼鄉友作新年

古詩

係足

謫居三適夜卧濯足

蘇子瞻

長安大雪年束薪抱衾稠雲安市無井斗水寬百憂今
我逃空谷孤城嘯鵲鷗得米如得珠食菜不敢留况有
松風聲釜鬲鳴颼颼瓦盎深及膝時復冷煖投明燈一
爪剪快若鷹辭韉天低瘴雲垂地薄海氣浮土無重脰
藥獨以薪水瘳誰能更包裹冠履裝沐猴

髑髏

羣書要語髑髏頂也

說文

賴顱謂之髑髏

廣雅

古今事實

扣問髑髏

莊子使楚見空髑髏擊以馬捶而問曰夫子貪生失理而為此乎將有凍餒之患而為此乎語卒援髑髏見夢曰夫死無君於上無臣於下亦無四時之事與天地為春秋雖南面帝王樂不能過也

未嘗生死

列子適衛食於道從者見百歲髑髏攘蓬而指顧謂弟子百豐曰唯予與彼知而未嘗生未嘗死也

繫著鞍上

王忠先因饑啖人五官將與共從駕出行過冢間無何令取道邊死人髑髏著忠馬鞍上以為戲笑

魏畧

草生髑髏

陳留周氏婢名興進入山取樵夢見一女語之曰近在

汝頭前目中有刺煩拔之當有厚報牀頭果有一朽棺
頭穿壞髑髏墮地草生目中便為拔草內著棺中以甕
塞穿即於髑髏處得一雙金指環

桓沖之
述異記

安青竹上

元和初市有披麻短女子長三尺許咄咄若有所九每
云千忍萬忍終須決一場不放伊忽一日遇一小兒徑
前去其衣乃一青竹安髑髏耳

炙穀
子

古今文集

雜著

髑髏說

陳王植

曹子遊乎陂塘之濱步乎蓁穢之數蕭條潛虛經幽踐
阻顧見髑髏塊然獨居於是伏軾而問之曰子將結纓
首劍殉國君乎將被堅執銳斃三軍乎將嬰茲固疾命
殞傾乎將壽終數極歸幽冥乎叩遺骸而歎息哀白骨
之無靈慕嚴周之適楚儻託夢以通情於是倅若有來
恍若有存影見容隱厲聲而言曰子何國之君子乎既

枉輿駕愍其枯朽不惜咳唾之音慰以苦言子則辯於
辭矣然未達幽冥之情識死生之說也夫死之為言歸
也歸也者歸於道也歸於道者身以無形為主故能與
化推移陰陽不能更四時不能虧是故洞於纖微之域
通於恍惚之庭望之不見其象聽之不聞其聲挹之不
冲注之不盈吹之不凋嘘之不榮激之不流凝之不停
寥落冥漠與道相拘偃然長寢樂莫是踰曹子曰子將
請之上帝求諸神靈使司命輟疾而反子骸形於是髑

體長呻廓皆曰甚矣何子之難語也昔太素氏不仁無
故勞我以形苦我以生今也幸變而之死是反吾真也
何子之好勞而我之好逸子則行矣余將歸於太虛於
是言卒響絕神光霧除顧將旋軫乃命僕夫拂以玄塵
覆以縞巾爰將藏彼路濱壅以丹土翳以綠榛存亡之
異勢乃宣尼之所陳何神憑之虛對云死生之必均

黽體頌

黃魯直

黃沙枯黽體本是桃李面如今不忍看當時恨不見業

風相鼓擊美目巧笑倩無脚又無眼看便成一片

詩話

戰死髑髏

劉貢父詠史云自古邊功緣底事多因嬖倖欲封侯不
如直與黃金印惜取沙場萬髑髏往往指王韶李憲輩
唐人曹松亦云憑君莫話封侯事一將成功萬骨枯

魂魄

羣書要語精氣為物游魂為變易魂氣歸于天形魄歸

于地郊特牲氣者神之盛也魂者鬼之盛也禮記天氣為魂

地氣為魄淮南子魂者何謂也魂猶佗佗也行不休也動

則主於情魄者白也猶著人者也主於性白虎通子產曰

人生始化曰魂既生曰魄左心之精爽是謂魂魄左師傳

言欲求長生當對服大藥欲得通神當水火形分形分則自見其身三魂七魄而天地靈祇皆可接山川之神

皆可役也

詩句暖湯濯我足剪紙招我魂杜彭衡詩

古今事實

祓除招魂

鄭國之俗三月上巳於溱洧之上招魂續魄秉蘭草祓

除不祥

韓詩外傳

魂氣無不之

延陵季子適齊長子死葬於贏博之間既封左袒右還其封曰若魂氣則無不之

魂魄思鄉

漢高祖謂沛父兄曰遊子悲故鄉吾雖都關中萬歲後
吾魂魄猶思沛也

魂魄登山

羊祐與鄒潤甫登峴山垂泣曰我百年後魂魄猶當登

此山也

襄陽耆
舊傳

古今文集

雜著

招魂

宋玉

朱氏曰招魂者宋玉之所作也古者人死則以其上服升屋履危北面而號曰皋某復遂以其衣三招之乃下以覆尸此禮所謂復而說者以為招魂復魂又以為盡愛之道而有禱祠之心者蓋猶冀其復生也如是而不生則不生矣於是乃行死事此制禮者之意也而荆楚之俗乃或以是而施之生人故宋玉哀閔屈原無罪放逐恐其魂魄離散而不復還遂因國俗託帝命假巫語以招之以禮

言之固為鄙野然其盡愛以致禱則猶古人之遺
意也是以太史公讀之而哀其志焉若其謫怪之
談荒淫之志則昔人蓋已誤其譏於屈原今皆不
復論也

朕幼清以廉潔兮身服義而未沫主此盛德兮牽於俗
而蕪穢上無所考此盛德兮長離殃而愁苦帝告巫陽
曰有人在下我欲輔之魂魄離散汝筮予之巫陽對曰
掌夢上帝其命難從若必筮予之恐後之謝不能復用

巫陽焉乃下招曰魂兮歸來去君之恒幹何為乎四方
些舍君之樂處而離彼不祥些魂兮歸來東方不可以
託些長人十仞惟魂是索些十日代出流金鑠石些彼
皆習之魂往必釋些歸來歸來不可以託些魂兮歸來
南方不可以止些雕題黑齒得人肉以祀以其骨為醢
些蝮蛇綦綦封狐千里些雄虺九首往來儵忽吞人以
益其心些歸來歸來不可以久淫些魂兮歸來西方之
害流沙千里些旋入雷淵靡散而不可止些幸而得脫

其外暗害些赤螳若象玄蜂若壺些五穀不生藂管是
食些其土爛人求水無所得些彷徨無所倚廣大無所
極些歸來歸來恐自遺賊些魂兮歸來北方不可以止
些增冰峨峨飛雪千里些歸來歸來不可以久些魂兮
歸來君無上天些虎豹九關啄害下人些一夫九首拔
木九千些豺狼從目往來佻佻些懸人以娛嬉投之深
淵些致命於帝然後得瞑些歸來歸來往恐危身些魂
兮歸來君無下此幽都些土伯九約其角鬻鬻些敦厥

血拇逐人駉駉些參目虎首其身若牛些此皆甘人歸
來歸來恐自遺災些魂兮歸來入脩門些工祝招君背
行先些秦篝齊縷鄭綿絡些招具該備永嘯呼些魂兮
歸來反故居些天地四方多賊姦些像設君室靜聞安
些高堂邃宇檻層軒些層臺累榭臨高山些網戶朱綴
刻方連些冬有突屨夏室寒些川谷徑復流潺湲些光
風轉蕙汜崇蘭些經堂入奧朱塵筵些砥室翠翹挂曲
瓊些翡翠珠被爛齊光些弱阿拂壁羅幃張些纂組綺

縞結琦璜此室中之觀多珍怪此蘭膏明燭華容備此
二八侍宿射選代此九侯淑女多迅衆此盛鬋不同制
實滿宮此容態好比順彌代此弱顏固植審其有意此
姱容脩態絙洞房此娥眉曼睂目騰光此靡顏膩理遺
視矚此離榭脩幕侍君之間此翡翠帳飾高堂此紅
壁沙版玄玉之梁此仰觀刻桷畫龍蛇此坐堂伏檻臨
曲池此芙蓉始發雜芰荷此紫莖屏風文緣波此文異
豹飾侍陂陲此軒輶既祗步騎羅此蘭薄戶樹瓊木籬

此魂兮歸來何遠為此室家遂宗食多方此稻粱穉麥
挈黃梁此大苦酸酸辛甘行此肥牛之腴腠若芳此和
酸若苦陳吳羹此肺鯪炮羔有柘漿此鵠酸臠鳧煎鴻
鶻此露鷄臠螭厲而不爽此秬粬蜜餌有饅飴此瑤漿
蜜勺實羽觴此挫糟凍飲卧清涼此華酌既陳有瓊漿
些歸反故室敬而無妨些肴羞未通女樂羅些陳鍾按
鼓造新歌些涉江採菱發揚阿些美人既醉朱顏酡些
娛光眇視目曾波些被文服纖麗而不奇些長髮曼鬋

豔陸離些二八齊容起鄭舞些社若交竿撫案下些竽
瑟狂會填鳴鼓些宮庭震驚發激楚些吳歎蔡謳奏大
呂些士女雜坐亂而不分些放敝組纓班其相紛些鄭
衛妖玩來雜陳些激楚之結獨秀先些崑蔽象碁有六
博些分曹竝進道相迫些成臬而牟呼五白些晉制犀
比費白日些鏗鐘搖箴揆梓瑟些娛酒不廢沈日夜些
蘭膏明燭華鐙錯些結撰至思蘭芳假些人有所極同
心賦些耐飲盡歡樂先故些魂兮歸來反故居些亂曰

獻歲發春兮汨吾南征
葦蘋齊葉兮白芷生路貫廬江
兮左長薄倚沼畦瀛兮遙望博青驪結駟兮齊千乘懸
火延起兮玄顏烝步及驟處兮誘騁先抑驚若通兮引
車右還與王趨夢兮課後先君王親發兮憚青兕朱明
承夜兮時不可淹皋蘭被徑兮斯路漸湛湛江水兮上
有楓目極千里兮傷春心魂兮歸來哀江南

古今事文類聚後集卷二十

欽定四庫全書

子部

古今事文類聚後集卷二十一

詳校官中書_臣康綸鈞

侍讀_臣孫球覆勘

總校官編修_臣王燕緒

校對官中書_臣趙東澍

謄錄監生_臣胡曉春

欽定四庫全書

古今事文類聚後集卷二十一

宋 祝穆 撰

肖像部

眠睡

羣書要語睡翕目也

說文

卧化其精神變化也寐謚也靜

無聲也寢侵也損事功也瞑泯也無知泯沒也

釋名寢不

尸

論語

北人以晝寢為黑甜

青箱雜記

君安得高枕而卧

張良傳

煩惱毒蛇睡在汝心譬如黑蛇在汝室當何以戒之鉤

手併除之睡蛇既出乃可安眠

遺教經

詩句曰高丈五睡正濃將軍打門驚周公

虛全

我醉欲眠

卿且去明朝有意抱琴來

李白

醉中有客眠何害須信淵

明未苦賢

坡

先生骨清少眠睡長夜默坐數更鼓

坡

日

長唯有睡偏宜半脫紗巾落紈扇

坡

少思多睡無如我

鼻息如雷撼四隣

坡

已為物象添詩瘦更被春陰長睡

魔

石曼卿

雲臥衣裳冷

杜

敲門驚晝睡

韓

平生睡足處雲

夢澤南州

杜牧

昏昏一覺眠不博早朝人

白

雨作枕簟秋

官閒省中睡

山谷

遁世名為累留年睡作魔

後村

佳眠未知

曉屋角聞晴哢

山谷

晨雞催不起擁被聽松風

山谷

三盃軟

飽後一枕黑甜餘

坡

古今事實

晝寢

宰予晝寢子曰朽木不可雕也糞土之牆不可朽也於予與何誅

卧治

汲黯拜淮陽太守伏謝不受上曰君薄淮陽耶顧淮陽吏民不相得徒得君重臥而治之

臣足加君腹

見隱逸門

頭觸屏風

見敬士門

寢藉帝衣

董賢常與上卧起嘗畫寢偏藉上衣袖上欲起恐動賢乃斷袖而起

嘲師欲眠

見師門

寢中奴縛

彭寵自立為燕王其妻數惡夢又多見變怪五年春寵
齋獨立便室蒼頭子密等三人因寵卧寢寐共縛寵著
牀告外吏示大王齋禁皆使吏休

被酒坐睡

後漢劉寬嘗講經於靈帝前被酒坐睡

常憑几寢

王莽軍師外破大臣內叛憂懣不能食但飲酒啗鰕魚
讀軍書倦因憑几寢不復就牀

驚眠便斫

魏武云我眠中不可妄近近便斫人亦不覺左右宜深
慎此後佯睡所幸人竊以被覆之因便斫殺自後安眠
人莫敢近者

世說

義皇上人

陶潛戒子書五六月北窻下卧涼風暫至自謂義皇上

人

我眠卿去

淵明貴賤造之者有酒輒設淵明若先醉便語客我醉
欲眠卿且去其真率如此

哈臺大斡

許侍中瑒顧司空和俱為丞相從事嘗夜至丞相府宴
二人歡接丞相便命入已帳眠顧至曉回轉不得快熟
許上床便哈臺大斡丞相顧謂客曰此中亦難得眠處

說世

方卧起迎

謝遏

朗即

夏月嘗卧卧謝公清晨卒来未暇著衣跣出屋

外方躡問訊公曰汝可謂前倨後恭

世說

晝寢書裙

見書學門

眠寤知姦

何衽為成都令嘗眠睡其覺寤使得姦詐咸畏衽之發
擿或以為有術得知之無敢復欺者

益都者
舊傳

行亦美睡

夏侯隱每登山渡水閉目美睡同行聞其鼾聲而不蹉

跌人謂之弼仙

神仙傳

攝心無寐

震旦第四祖攝心無寐脅不至席僅六十年

傳燈錄

睡魔

降魔藏禪師傳秀師曰此無山精木怪汝翻作魔耶

傳燈

錄

睡則半載

陳搏希夷先生每睡則半載或數月近亦不下月餘

鼻息如雷

見雷門

睡相

徐光溥為相喜論時事大為李昊所疾光溥後不言每

聚議假寐而已時號睡相

外史
檮杌

睡一局

見慕門

古今文集

古詩

狂歌行

杜甫

與君行年校一歲賢者是兄愚者弟兄將富貴等浮雲
弟切功名好雄勢長安秋雨十日泥我曹韉馬聽晨雞
公卿朱門未開鎖我曹已到肩相齊吾兄睡穩方舒膝
不韉不巾踏曉日男啼女哭莫我知身上細繒身中實
今年思我來嘉州嘉州酒重花繞樓樓頭喫酒樓下卧
長歌短歌還相酬四時八節還拘禮女拜弟妻男拜弟

幅巾鞞帶不掛身頭脂足垢何曾洗吾兄吾兄巢許倫
一生喜怒長任真日斜枕時寢已熟啾啾唧唧為何人

陳搏隱武當山後居華州雲臺觀多閉門獨
卧或累月不起周世宗召入禁中局戶試之
月餘始開搏熟寐如故嘗對御歌云

臣愛睡臣愛睡不卧氈不蓋被片石枕頭蓑衣鋪地震
雷掣電鬼神驚臣當其時正鼾睡間思張良悶想范蠡
說甚孟德休言劉備這三四君子只是爭閒氣爭如臣

向青山頂頭白雲堆裡展開眉頭解放肚皮且一覺睡
管甚玉兔東生紅輪西墜

昔有衣冠子金勵問希夷先生曰勵向遊華
山欲見先生先生睡未覺亦有道乎先生笑
而不言答以詩二章

常人無所重惟睡且為重舉世此為息魂離神不動覺
來無所知貪來心愈用堪笑塵世中不知夢是夢

至人本無夢其夢本遊仙真人本無睡睡則浮雲煙爐

裏名為藥壺中別有天欲知睡夢裏人間第一玄

謫居三適午窻坐睡

蘇子瞻

蒲團盤兩膝竹几閣雙肘此間道路熟徑到無何有身心兩不見息息安且久睡蛇本亦無何用鉤與手神凝疑夜禪體適劇卯酒我生有定數祿盡空餘壽枯楊不飛花膏澤回衰朽謂我此為覺物至了不受謂我今方夢此心初不垢非夢亦非覺請問希夷叟

午寢

黃魯直

讀書常厭煩
燕處意坐馳
動靜兩不適
塵勞敗天倪
目昏生黥花
耳聾喧鼓輦
沈憂愁五神
倦劇委四肢
不聊終日堪
况乃久遠期
投書曲肱卧
天游從所之
是身入華胥
鬚勝初時春
蠶卧巨箔夏
蜩化枯枝今
之隱几者
豈有異子綦
覺寐須臾間
良亦休我疲
迺知大覺夢
盖此德之歸
誰為今日是
二十二年非

律詩

午睡

陳後主

午醉醒來晚無人夢自驚夕陽如有意偏傍小窗明

午睡

王介甫

簷日陰陰轉牀風細細吹翛然殘午夢何許一黃鸝

宿社家亭子

賈島

山頭井是溪中石井底泉通竹下池宿客不眠過夜半
獨開山雨到來時

車蓋亭

蔡持正

紙屏石枕竹方床手倦拋書午夢長睡起莞然成獨笑

數聲漁笛在滄浪

晝寢

黃魯直

紅塵席帽烏韉裏想見滄州白鳥雙
馬齒枯萁喧午枕
夢成風雨浪翻江

晝寢

蘇子瞻

食罷茶甌未要深清風一榻抵千金
腹搖鼻息庭花落
還盡平生未足心

懶起

邵堯夫

半記不記夢覺後似愁無愁情倦時擁衾側卧未收起
簾外落花撩亂飛

齊居

陳無已

青奴白牯靜相宜老罷形骸不自持倚枕南窗深閉閣
卧聽幾竹雨來時

深院

楊廷秀

鵲兒嗟唳梔黃嘴蜂子輕盈膩粉腰深院下簾人晝寢
紅薔薇架架碧芭蕉

初夏午睡

楊廷秀

梅子留酸軟齒牙
芭蕉分綠與窻紗
日長睡起無情思
閒看兒童捉柳花

春睡

蘇子美

別院簾昏掩竹扉
朝醒未解接春暉
身如蟬蛻一榻上
夢似楊花千里飛
嗒爾暫能離世網
陶然直欲見天機
此中有德堪為頌
絕勝人間較是非

夢

羣書要語占夢掌其歲時觀天地之會辨陰陽之氣以

日月星辰占六夢之吉凶一曰正夢二曰噩夢三曰思

夢四曰寤夢五曰喜夢六曰懼夢

春官

召彼故老訊之占

夢

正

陰氣壯則夢涉大水而恐懼陽氣壯則夢涉大火

而燔燭浮虛為疾者則夢揚沈實為疾者則夢溺

列子

真

人其寢不夢其覺無憂

大宗師

至人無夢

文中子

數遇惡夢

一曰魂妖二曰心賊三曰尸賊夢覺以左手躡人中二

七過啄齒二七遍反凶成吉夜遇善夢覺當摩目二七

叩齒三七遍

真誥

古今事實

夢遊華胥

黃帝憂天下之不治，竭聰明，盡智力，焦然饑色，旰黷昏然，五臟異感，於是放萬幾，退而閒居，大庭之館，齋心服形，三月不親政事，晝寢而夢遊於華胥氏之國。其國無師長，自然而已；其民無嗜欲，自然而已；不知樂生，不知惡死，故無夭殤，不知親已，不知疎物，故無愛憎，乘空如

履實寢虛若處牀雲霧不破其視雷霆不亂其聽神行而已黃帝既寐恬然自得曰今知至道不可以情求矣又二十有九年天下大治幾若華胥氏之國而帝登遐

子列

夢風后力牧

黃帝夢大風吹天下之塵垢皆去又夢人執千鈞之弩驅羊數萬羣帝寤而歎曰風為號令執政者垢去土解清治者天下豈有姓風名后者哉夫千鈞之弩異力能

遠者也驅羊數萬羣是能善牧者也天下豈有姓力名牧者於是依二夢之占而求之得風后于海隅登以為相得力牧於大澤進以為將

世紀

夢人負鼎

湯思賢夢見有人負鼎抗俎對已而笑寤而占曰鼎為和味俎者割裁天下豈有人為吾宰者哉

世說

夢得良弼

高宗夢得說使百工營求諸野得諸傅巖王曰夢帝賚

予良弼

夢與九齡

周文王謂武王曰汝何夢矣對曰夢帝與我九齡文王
曰女以為何也武王曰西方有九國君王其將撫諸文
王曰非也古者謂年齡齒亦齡也我百爾九十吾與爾
三焉文王九十七而終武王九十三而終

文王
世子

考牧夢魚

宣王考牧詩牧人乃夢衆維魚矣旒維旟矣大人占之

衆維魚矣實維豐年旒維旟矣室家濔濔

無羊

考室夢熊

宣王考室詩吉夢維何維熊維羆男子之祥維虺維蛇
女子之祥

夢天壓已

初穆子去叔孫氏及庚宗遇婦人使私為食而宿焉問
其行告之故哭而送之適齊娶於國氏生孟丙仲壬夢
天壓已弗勝顧而見人黑而上僂深目而顴喙號之曰

牛助余乃勝之旦而皆名其徒無之且曰志之宣伯曰
魯以先子之故將存吾宗必召女召女何如對曰願之
久矣魯人名之不告而歸既立所宿庚宗之婦人獻以
雉問其姓對曰余子長矣能奉雉以從我矣召而見之
則所夢也未問之名號之曰牛曰唯皆見其徒使視之
遂使為豎

昭四

夢祖道

楚子成章華之臺願與諸侯落之太宰遽啟疆來召公

公將往夢襄公祖梓慎曰君不果行襄公之適楚也夢
周公祖而行令襄公實祖君其不行子服惠伯曰行先
君未嘗適楚故周公祖以道也襄公適楚矣而祖以道
君不行何之三月公如楚

昭十

夢黃熊

鄭子產聘于晉晉侯有疾韓宣子逆客私焉曰寡君寢
疾於今三月矣竝走羣望有加而無瘳今夢黃熊入于
寢門其何厲鬼也對曰以君之明子為大政其何厲之

有昔堯殛鯀於羽山其神化為黃熊以入于羽淵實為
夏郊三代祀之晉為盟主其或者未之祀也乎韓子祀
夏郊晉侯有間賜子產莒之二方鼎

昭七

夢立子

衛襄公夫人姜氏無子嬖人嬖始生孟縶孔成子夢康
叔謂已立元余使羈之孫圉與史苟相之史朝亦夢康
叔謂已余將命而子苟與孔烝鉏之曾孫圉相元史朝
見孔成子告之夢夢協故立靈公

昭七

夢蘭

見誕子門

結草夢報

見報德門

夢二豎子

見醫門

夢吉而凶

主父荅榮之歌叔孫豎之兆似有其實矣卒基莫大之

禍

夢奠兩楹

見祭奠門

夢射月

晉呂錡夢射月中占之曰姬姓日也異姓月也必楚王也

左

夢監腦

晉侯夢與楚子搏楚子伏已而監其腦子犯曰吉我得天楚伏其罪吾其柔之

夢為鳥

宋昭公夢為鳥味加於南門尾加於北門曰予夢必立

夢周公

孔子曰甚矣吾衰也久矣吾不復夢見周公

夢中占夢

長吾子謂瞿鵲曰夢飲酒者旦而哭泣夢哭泣者旦而
田獵方其夢之不知其夢中之夢又占焉無異寤也固
乃非常人之所知

莊子

夢為蝴蝶

見蝶門

夢神龜

見龜門

夢高唐

見美女門

夢游釣天

趙簡子疾五日不知人及寤語大夫曰我夢之帝所游
於釣天廣樂九奏萬舞其聲動人也

史

夢蕉覆鹿

鄭人有薪於野者遇駭鹿擊而斃之恐人見之也遽而
藏諸隍中覆之以蕉不勝其喜俄而遺其所藏之處遂
以為夢焉順途而詠其事傍人有聞者用其言而取之
既歸告其室人曰向薪者夢得鹿而不知其處吾今得

之彼直真夢者矣室人曰若將是夢見薪者而得鹿耶
詎有薪者耶今真得鹿是若之夢真耶夫曰吾據得鹿
何用知彼夢我夢耶其妻又疑其為夢薪者歸復其真
夢藏之之處又夢得之之主案所夢而尋得之遂訟而
爭之歸之士師士師欲二分之以聞鄭君皆互有夢覺
之說相國曰欲辨夢覺惟黃帝孔丘

列子

夢乘赤龍

光武召馮異曰我昨夜夢乘赤龍上天覺寤心中動悸

異因下席拜賀曰此天命發於精神也遂與諸將議定

上尊號

東觀漢記

后夢捫天

和熹鄧后嘗夢捫天以訊占夢言堯舜攀天而上湯反
舐天皆聖王之夢

夢吐白鳳

見賦門

夢登天門

陶侃夢生八翼飛而上天見天門九重比登其八唯一

門不得入閭者以杖擊之因墜地折其左翼

夢遷太守

鄧殷為淮南太守夢行水邊見一女子虎在後來盪斷
鞞囊占者以為水邊有女汝字也斷鞞囊者新虎頭代
舊虎頭也果遷汝陰

夢舞拍手

見火災門

夢狼噉脚

索統傳郡功曹張邈嘗奉使詣州夜夢狼噉一脚統曰

脚肉被吮為却字會東虜反遂不行

夢竿中天

索統傳張弼當舉孝廉夢豎竿中天統曰此未字也弼果停

夢牛

蜀蔣琬夜夢一牛頭懸在門下流血滂沱趙直曰見血者事分明也牛角及鼻公字之象位當為三公果為中書令

夢松生腹

吳丁固為尚書夢松生其腹上謂人曰松字乃十八公也後十八歲吾其為公乎卒如夢焉

孫皓傳

夢三刀

王濬夢三刀於梁上又益一刀李毅賀曰明府其臨益州乎卒如其言

夢棺夢糞

或問殷浩將泣官而夢棺將得財而夢糞何也曰官本

臭腐財本糞土人以為名言

夢日繞城

晉明帝微行察王敦營壘敦正晝寢夢日環其城驚起
曰此必黃鬚鮮卑奴也

夢椽筆

王珣夢人以大筆如椽與之語人曰此當有大手筆事

夢紫文鷺

張薦祖鷺為兒時夢紫文大鳥五色成文止其庭大父

曰吾聞五色赤文鳳也紫文鸞鷟也若壯殆以文章瑞朝廷乎

三夢芻狗

魏文帝以周宣為中郎屬太史嘗有問宣曰吾昨夜夢見芻狗其占何也宣曰君得美食耳有頃出行果遇豐膳後又問曰昨夜復夢芻狗何也宣曰君墮車折脚宜戒之果如宣言後又問昨夜復夢芻狗何也宣曰君家失火當善護之俄遂火起問曰前後三時皆不夢也聊



試君耳何以皆驗宣曰此神靈動君使言故謂真夢無異又問宣曰三夢多狗而其占不同何也宣曰多狗者祭神之物故君始夢當得飲食祭祀既訖則多狗為車所鑠故中夢當墮車折脚車鑠之後必載為樵故後夢憂失火也

夢筆

夢破心

夢剖腸

並見
文章

夢雙陸

見博門

夢君別臣

魏證疾太宗夢與證別既寤流涕是夕證卒故白居易撰御製碑文云昔高宗得良弼於夢中朕今失賢臣於覺後

夢父類子

見姓名門

神祠謁夢

裴寂過華山祠祈神自卜夜夢老人謂曰君年踰四十

當貴

夢手捧天

見天門

古今文集

雜著

論夢生於想

衛玠問樂令夢云是想樂曰形神不接豈是想耶衛曰
因也樂曰未嘗夢乘車入鼠穴持麈啖鐵杵皆無想無
因故也衛思不得成病樂為解析即瘥樂嘆曰此兒胸

中必無膏肓之疾

東萊呂氏曰形神相接而夢者世歸之想形神不接而夢者世歸之因因之說曰因羊而念馬因馬而念車因車而念蓋固有牧羊而夢鼓吹曲蓋者矣是雖非今日之想實因於前日之想故因與想一說也信如是說無想則無因無因則無夢舉天下之夢不出於想而已矣然叔孫穆夢豎牛之貌於牛未至之前曹人夢公彊之名於彊未生之前是果出於想乎果出於因乎雖復起

樂廣於九原吾知其未必能判是議也

博張

古今占夢

漢藝文志七畧雜占十八家以黃帝長柳占夢十一卷
甘德長柳占夢二十卷為首其說曰雜占者紀百家之
象候善惡之證衆占非一而夢為大故周有其官周禮
太卜掌三夢之法一曰致夢二曰觭夢三曰咸陟鄭氏
以為致夢夏后氏所作觭夢商人所作咸陟者言夢之
得周人取焉而占夢專為一官以日月星辰占六夢之

吉凶其別曰正曰噩曰思曰寤曰喜曰懼季冬聘王夢
獻吉于王王拜而受之及舍萌于四方以贈惡夢舍萌
者猶釋采也贈者送之也詩書禮經所載高宗夢得說
周文王夢帝與九齡武王伐紂夢協朕卜宣王考牧牧
人有熊羆虺蛇之夢名彼故老訊之占夢左傳所書尤
多孔子夢坐奠於兩楹然則古之聖賢未嘗不以夢為
大是以見於七畧者如此魏晉方技猶時或有之今人
不復留意此卜雖市井妄術所在如林亦無一人以占

夢自名者其學殆絕矣

容齋
隨筆

枕中記

沈既濟

開元七年道士呂翁者得神仙術行邯鄲道中息邸舍
隱囊而坐俄見少年盧生衣短褐乘青駒亦止邸中與
翁言笑盧生顧其衣裝敝褻乃歎曰大丈夫生世不諧
困如是也翁曰子談諧方適而歎其困何也生曰吾嘗
志于學自惟青紫可拾今已過壯猶勤畎畝非困而何
言訖而目昏思寐時主人方蒸黍翁乃探囊中枕以授

之曰子枕吾枕當令子榮適如志其枕青磁而竅其兩
端生俛首就之見其竅漸大明朗乃舉身而入遂至其
家數月娶清河崔氏女女容甚麗生資愈厚明年舉進
士登第釋褐轉渭南尉俄遷監察御史轉起居舍人知
制誥三載出典同州遷陝牧移節汴州領河南道採訪
使徵為京兆尹是歲神武皇帝方事戎狄除御史中丞
河南道節度大破戎虜歸朝冊勲恩禮極盛轉吏部侍
郎遷戶部尚書兼御史大夫為時宰所忌以飛語中之

貶端州刺史三年徵為常侍未幾同中書門下平章事
同列復誣與邊將交結圖不軌下制獄中官為保之減
死投驩州數年帝知寃復進為中書令封燕國公生五
子有孫十餘人後以年逾八十病薨盧生欠伸而寤見
其身方偃於邸舍呂翁坐其傍主人蒸黍未熟生蹶然
而興曰豈其夢寐也耶翁謂生曰人世之適亦如是矣
生憮然良久謝曰夫寵辱之道窮達之運得喪之理死
生之情盡知之矣此先生所以窒吾欲也敢不受教稽

首再拜而去

大槐宮記

陳翰

淳于棼家廣陵宅南有古槐生豪飲其下因醉致疾二
友扶生歸卧夢二玄衣使者曰槐安國王奉邀生隨二
使上車指古槐入一穴中大城朱門題曰大槐安國有
一騎傳呼曰駙馬遠降引生升廣殿見一人衣素練服
朱華冠令生拜王王曰前奉賢尊命許令女瑤芳奉事
君子有仙姬數十奏樂執燭引導金翠步障玲瓏不斷

至一門號脩儀宮一女子號金枝公主儼若神仙交驩
成禮情禮日洽王曰吾南柯郡政事不理屈卿為守敕
有司出金玉錦繡僕妾車馬施列廣衢餞公主行夫人
戒子曰淳于郎性剛好酒為婦之道貴在柔順爾善事
之生累日至郡有官吏僧道音樂來迎下車省風俗察
疾苦郡中大理凡二十載百姓立生祠王賜爵錫邑位
居台輔生五男二女榮盛莫比公主遇疾而薨生請護
喪赴國王與夫人素服慟哭於郊備儀羽葆鼓吹葬主

于盤龍岡生以貴戚威福日盛有人上表云玄象謫見
國有大恐都邑遷徙宗廟崩壞事坐蕭牆時議以生僭
侈之應王因命生曰卿可暫歸本里一見親族諸孫無
以為念復令二使者送出一穴遂寤見家僮擁篲于庭
二客濯足于榻斜日未隱西垣餘尊尚湛東牖因與二
客尋古槐下穴洞然明朗可容一榻上有土壤為城郭
臺殿之狀有蟻數斛二大蟻素翼朱首乃槐安國王又
窮一穴直上南枝羣蟻亦處其中即南柯郡也又一穴

盤屈若龍蛇狀有小墳高尺餘即盤龍山岡也生追想
感歎遽遣掩塞是夕風雨暴發旦視其穴遂失羣蟻莫
知所之國有大恐都邑遷徙此其驗矣

財貨銘

李瑩

暇日讀夢書則曰夢虺夢糞者獲財因以銘之
財貨將至夢寐可尋或穢或虺乃玉乃金穢可親虺
可玩歟敢獻斯銘以激貪夫

律詩

疑夢

王維

莫驚寵辱非憂喜
莫計恩讎浪苦辛
黃帝孔丘何處問
安知不是夢中身

春夢

岑參

洞房昨夜春風起
遙憶美人湘江水
枕上片時春夢中
行盡江南數千里

夢

王介甫

黃粱欲熟且留連
漫道春歸莫悵然
蝴蝶豈能知夢事

蘧蘧飛墮晚花前

書定林院窻

王介甫

竹雞呼我出華胥起滅篝燈擁燎爐
試問道人何所夢但言渾忘不言無

書懷

王介甫

三年衣染禁城塵撫事茫然愧古人
明月滄波江萬頃扁舟長載夢中身

絕句

劉貢父

青苔滿地初晴後綠樹無人晝夢餘惟有南風舊相識
徑開門戶又翻書

睡起即事書御史臺壁

陳洙

清朝無事諫章疎多病長年卧直廬惆悵平生不如夢
春來三度到溪居

絕句

蘇子美

別院深深夏簾清石榴開遍透簾明樹陰滿地日亭午
夢覺流鶯時一聲

笑

葦書要語啞笑也啞大笑也听笑貌欣笑喜也

說文

莞爾

而笑

論語

喟喟終日注笑也

嵇康琴賦

是故哂之注哂亦作矧

笑至齒為矧

語

𪔐

且刃反

然而笑

莊子

俯而掩口盧胡而笑

後應劭傳

粲然皆笑

左昭

適爾而笑

賓戲

笑言啞啞

震卦

撫掌歡笑

晉武紀

掀髯一笑

坡集

盧胡絕倒

歐集

下士聞道大笑之不笑

不足以為道

老子

桓子新論曰關東語曰人聞長安樂則

出門西向而笑

論衡

人生上壽百歲中壽八十下壽六十

病瘦死喪憂患其中開口而笑者一月之中不過四五

日而已

莊子

合坐皆笑謂之哄堂哄堂笑不罰

唐三院制

詩句仰天大笑出門去我輩豈是蓬蒿人

李

嫣然一笑

百媚生

長恨歌

古今事實

欲褒似笑

戎嘗寇周幽王擊鼓諸侯皆至褒似大悅而笑王欲褒
似之笑數擊鼓而諸侯至無寇及真寇至擊鼓而諸侯

不至遂為戎所滅

春秋 呂春

使者遭笑

季孫行父禿晉卻克跛衛孫良夫眇曹公子首僂同聘
於齊齊使禿者御禿者跛者御跛者僂者御僂者蕭同
叔子處臺而笑之客不悅

叔梁 傳

時然後笑

子問公叔文子於公明賈對曰夫子時然後笑人不厭
其笑

斬笑璧者

平原君勝家樓臨民家民家有璧者樂散

音姍

行汲平原

美人居樓上見大笑之明日璧者詣平原請曰臣聞君之喜士以能貴士而賤士也臣願得笑臣者頭平原君笑應曰諾居半歲賓客去者過半於是平原君乃斬笑璧者其後門下乃復稍來

教戰斬笑

見前寵妾門

作齟齬笑

梁冀妻孫壽能作齟齬笑以為媚惑

詳見淫婦門

大笑纓絕

楚大發兵加齊齊王使淳于髡之趙請救兵齎金百斤車馬十駟淳于髡仰天大笑冠纓索絕

射雉妻笑

見美女門

笑人寂寂

見志氣門

大笑污幘

魏太祖為人佻易無威儀每與人談論戲弄言確盡無

所隱及歡悅大笑至以頭沒杯案中肴膳皆沾汚巾幘

曹操

別傳

體貌多笑

蜀譙周體貌朴素性推誠不飾初見丞相亮左右皆笑
既出有司請推笑者亮曰孤尚不能忍況左右耶

嗔笑不同

宋謝莊代顏峻為吏部尚書峻毅不可犯莊有喧訴常
懼笑答之時人語曰顏吏部嗔而與人官謝吏部笑而

不與人官

無怒好笑

孫登性無恚怒人或投諸水中欲觀其怒登既出便大笑

墮水而笑

見風濤之險門

人笑齒冷

樂預傳曰此事人笑褚公至今齒冷無為效也

笑中有刀

李義甫容貌溫恭與人語必嬉怡微笑而狡險忌剋故
時人謂義甫笑中有刀

恐婢妾笑

見問
病門

笑比河清

包孝肅峭嚴未嘗有笑容人謂包希仁笑比黃河清

墨客

揮犀

笑面似靴皮

田元均在三司深厭干請不欲峻拒每溫顏強笑以遣

之嘗曰作三司使數年直笑得面似靴皮

古今文集

雜著

三笑圖贊

跋見俳優門

蘇子瞻

彼三士者得意忘言盧胡一笑其樂也天嗟此小童麋
鹿狙猿爾各何知亦復粲然萬生紛綸何鄙何妍各笑
其笑未知孰賢

答王載言書

李翱

韓退之曰唯陳言之務去假令述笑哂之狀曰莞爾則
論語言之矣曰啞啞則易言之矣曰粲然則穀梁子言
之矣曰道爾則班固言之矣曰輟然則左思言之矣吾
復言之與前文何以異

嘯

羣書要語其嘯也歌注盛口而出聲也

江有

嘯吹聲

雜字

解
話

古今事實

倚柱而嘯

魯漆室之女過時未適人倚柱而嘯傍人聞之心莫不
為之慘者鄰婦從之遊曰何嘯之悲也子欲嫁乎吾為
子求偶漆室女曰吾豈為不嫁之故而悲哉憂吾君老
太子少矣

列女詳見
憂國門

但坐嘯

後漢成瑨為南陽太守委功曹岑暄郡中謠曰南陽太
守岑公孝弘農成瑨但坐嘯

抱膝長嘯

諸葛亮在荊州遊學每晨夜常抱膝長嘯

岸幘嘯詠

謝弈桓溫辟為安西司馬猶推布衣之好在溫座岸幘嘯詠無異常日溫曰我方外司馬

掩鼻長嘯

桓宣穆使人尋廬山見一人謂之曰君過前嶺必逢二年少相隨長嘯試要問之若不與言者可速去此人過

嶺果見二年少以袂掩鼻長嘯狀如惡鼻呼不與言

陽

記

倚柈長嘯

王廙字世將倚柈樓長嘯神氣甚逸王導謂庾亮曰世將為傷時識事亮曰正足舒其逸氣耳

蘇門長嘯

阮籍性樂酒善嘯聲聞數百步籍嘗箕踞嘯歌酣飲自若時蘇門山中忽有真人在焉籍親往尋其人擁膝巖

顛遂登巔從之箕坐相對籍乃商略終古以問之屹然
不應籍因對之長嘯有間彼又斷然笑曰可更作籍乃
為嘯意盡退還半嶺巔顛啗然有聲若數部鼓吹顧瞻
乃向人之嘯也

登樓清嘯

劉越石為胡騎所圍城中窘迫劉乘月登樓清嘯胡騎
聞之皆淒然長歎

不廢我嘯

見齒門

長嘯呼風

趙炳嘗臨水從船人乞渡船人不許炳乃張蓋坐其中

長嘯呼風亂流而濟

搜神記

長嘯公

見賦門

古今文集

雜著


嘯賦

晉成公綏

逸羣公子體竒好異傲世忘榮絕棄人事於是延友生

集同好精性命之至機言道德之玄奧邈跨俗而遺身
乃慷慨而長嘯發妙聲於丹唇激哀音於皓齒響抑揚
而潛轉氣衝鬱而燥起協黃鍾於清角雜宮商於流徵
飄遊雲於秦清集長風乎萬里諒自然之至音非絲竹
之所擬是故聲不假器用不借物近取諸身役心御氣
動脣有曲發口成音觸歎感物因歌隨吟清激切於竽
笙優潤和於琴瑟列列颼揚啾啾響作奏胡馬之長思
向寒風乎北朔又似鴻鴈之將雛群鳴號乎沙漠故能

因形創聲隨事造曲應物無窮機發響速乃吟詠而發
散聲繹繹而相連心滌蕩而無累志離俗而飄然



古今事文類聚後集卷二十一